

法身語報身文

王驤陸上師 著

# 《法身语报身文》

王骧陆上师 著

2022 年 12 月排版



HOME OF THE HEART

以般若为宗 以总持为法 以净土为归

## 法身语报身文

民国庚辰秋，熊君为摄影。戏作《法身语报身文》题之于后，用以自警。且劝世之视幻躯过重，枉自尘劳者。

与君同生，五十五年。形影不离，从不相见。  
今忽回头，始识君面。我能见君，君不我见。  
君之与我，非一非二。人以见君，乃知有我。  
我隐于微，君显于前。赖君之身，我得依恃。  
非君之舌，我无以言。借君之目，用辨于色。  
借君之耳，我得闻佛。种种方便，伊谁之力。  
拜君之惠，亦云至矣。念君之德，何异于亲。  
虽然本来，实又非君。君与我交，常而不亲。  
君不我知，岂为知心。我有烦恼，君不我解。  
我思作恶，君助为虐。君之衣食，惟我之力。  
不如君意，面红耳赤。一事之微，尝愠于色。  
为君扬眉，我则奔蹶。为君吐气，我劳心力。  
一生辛苦，又为谁忙。此何因缘，惟问彼苍。  
我欲绝君，乃不我弃。至死方休，附骨之疽。  
我之绝君，如是之深。而我妻孥，则又爱君。  
认君为我，目为至亲。悲君衰老，恐君疾病。  
闻君不寿，彼则心惊。人笑其痴，我原其情。

呜呼知己，难言之矣。君未我知，遑责于彼。  
行当自返，复自怜矣。我之与君，无我无人。  
亦怨亦偶，非假非真。君之来焉，我实邀之。  
我求名利，君亦劳止。贪嗔之念，由我而起。  
我若息心，君亦安止。我如成佛，君居其名。  
我若作贼，系及君身。其权在我，君则奉行。  
谁为之奴，谁作主人。君不负我，我实负君。  
今与君约，期各相安。君不我逼，我不苦君。  
苦乐随缘，任运而行。我本自在，无求于人。  
以孤为性，超然不群。大雄峰上，独坐为尊。  
君为我侣，亦所欢迎。若复谢去，亦勿留情。  
今假君躯，以销夙业。奉养君者，若款上宾。  
彼此相知，即称知己。同来此世，一场游戏。  
惜君无常，我则不死。几时分手，君东我西。  
览斯文者，或笑或啼。与我一样，如是而已。

（本文载《觉有情》半月刊第 58、59 期合刊 1942 年）